

Efni: Umsögn foreldraráðs Arnarsmára um starfsáætlun 2023-2024

Í upphafi októbermánaðar var fundur með foreldrum í Arnarsmára. Fundurinn var vel sóttur og því ber að fagna, foreldrar sýna skólanum og starfinu mikinn áhuga. Þessi áhugi er í takti við niðurstöður úr Skólapúlsinum þar sem 81,3% svarhlutfall var frá foreldrum. Á fundinum var óskað eftir foreldrum í foreldrafélag sem og foreldraráð Arnarsmára. Foreldraráðið fagnar því að hafa hlutverk foreldraráðsins annars vegar og foreldrafélagsins hins vegar skýr þannig að öllum aðilum sé ljóst að munur sé á þessum hópum.

Skóladagatal leikskólaársins 2023-2024 var kynnt foreldrum í lok ágústmánaðar 2023. Uppfærð útgáfa af dagatalinu var send 13. nóvember. Foreldraráðið fagnar auknu samstarfi milli skólastiga í Kópavogi og bendir þar sérstaklega á skipulagsdaga í þeim efnum.

Óhætt er að segja að starfsáætlunin sem og skóladagatalið rími vel við þá stefnu sem skólinn hefur sett sér síðastliðin ár. Starfsáætlunin er skýr, vel uppsett og læsileg.

Það er gaman að sjá hvað Arnarsmári leggur mikinn metnað í alþjóðlegt samstarf og er það af hinu góða. Það sýnir metnað í því að þróa starfið áfram og horfa gagnrýnum augum á það sem gert er í dag í skólastarfinu. Barnasáttmálanum er gert hátt undir höfði sem og vinnu með Blæ og Lubba. Auk þess ber að nefna uppeldisstefnuna „Uppbygging sjálfsaga – Uppeldi til ábyrgðar“ sem unnið er eftir í leikskólanum. Með því er unnið að því að kenna börnunum sjálfsskjórn og sjálfsaga og kenna þeim að læra af mistökum í samskiptum og leiðréttu mistök.

Í áætluninni kemur fram að í Arnarsmára sé markvisst unnið með einkunnarorð skólans sem eru frumkvæði, vinátta og gleði. Það kemur vel fram í daglegu starfi leikskólans.

Upplýsingaflæði hefur verið mjög gott og hægt er að hrósa starfsfólk skólans fyrir það. Foreldrar fá tölvupósta um viðburði og það sem er á döfinni, reglulega er sendur út póstur með myndum af starfinu á deildunum með Microsoft Sway og eins eru upplýsingablöð hengd upp í fatahengjunum.

Starfsfólkid á Arnarsmára er í einu orði sagt frábært og það er augljóst að því líður vel í vinnunni. Starfsmannaveltan hefur verið lítil undanfarin ár og foreldraráðið gerir sér grein fyrir því að það er ekki sjálfgefið og hvetur um leið skólastjórnendur til að halda áfram þeirri góðu vinnu sem hefur verið unnin innan leikskólans hingað til. Ánægjulegt er að sjá að starfsfólk sem komið er á aldur minnki við sig vinnuna og hætti ekki alveg. Það er gott að vita af því að leikskólinn sé með góða bakvarðasveit.

Það er sama hvar litið er á skólastarfið í Arnarsmára, þar skín í gegn metnaður starfsfólks og skólastjórnenda fyrir því að gera vel. Skólaáætlunin endurspeglar þann metnað.

Foreldraráðið leggur áherslu á að farið verði í framkvæmdir sem liggur fyrir að þurfi að gera á salernis- og skiptiaðstöðu sem og eldhúsini í sumarlokun næsta árs og verði ekki frestað lengur. Starfsmenn komu með athugasemdir varðandi þessar framkvæmdir í starfsmannasamtali.

KK

SKP DRH

Foreldraráðið saknar þess að sjá greiningu eða athugasemdir varðandi styttinguna á viðverunni hjá börnunum. Það er okkar tilfinning að þessar breytingar hafi haft mikil og góð áhrif á skólastarfið í heild sinni og því væri áhugavert að fá nánari upplýsingar um upplifun skólastjórnenda af því.

Fyrir hönd foreldraráðs Arnarmára

Sæunn Kolbinn Þórvíðdóttir
Ísak Hilmarsson
Dana Rún Heinarsdóttir